

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/ KANTON SREDIŠNJA BOSNA
KANTONALNI SUD U NOVOM TRAVNIKU
Broj: 06 0 V 018941 24 V
Novi Travnik, 17.09.2024. godine

Kantonalni sud u Novom Travniku, sudija Denis Trifković, u vanparničnom postupku predlagatelja A. M. iz T., nastanjen na adresi ... S., S. R.Nj., zastupan po punomoćnicima Greda Emiru, Greda Vedranu i Greda Miranu, advokatima iz Advokatskog društva „Greda“ d.o.o. Konjic, ulica Kolonija broj 34, protiv protupredlagateljice A. V. iz L., R. S., trenutno nastanjene na adresi ... S., S. R. Nj., radi priznanja strane sudske odluke o razvodu braka, dana 17.09.2024. godine, donio je slijedeće:

RJEŠENJE

Priznaje se odluka o razvodu braka Općinskog suda Stuttgart, Savezna Republika Njemačka broj: 20 F 2472/10 od 01.03.2011. godine koja je pravosnažna od 15.04.2011. godine, a kojom se 1 (prvim) stavom izreke razvodi brak vanparničnih stranaka sklopljen ... godine pred matičarem Generalnog konzulata Jugoslavije u Stuttgartu (broj vjenčanog lista ...), između predlagatelja M. A., rođen ... godine u T., BiH i protupredlagateljice V. A., rođena ... godine u L., Republika Srbija.

Obrazloženje

Predlagatelj je putem punomoćnika Greda Emira, Greda Vedrana i Greda Mirana, advokata iz Advokatskog društva „Greda“ d.o.o. Konjic preporučenom pošiljkom od 11.01.2024. godine, a koja je u ovaj sud zaprimljena dana 15.01.2024. godine podnio pismeni prijedlog za priznanje strane sudske odluke o razvodu braka Općinskog suda Stuttgart, Savezna Republika Njemačka broj: ...od 01.03.2011. godine. Uz prijedlog je priložio original stranu sudsku odluku čije se priznanje traži, prevod iste sačinjen od ovlaštenog sudskog tumača za njemački jezik sa područja BiH, Internacionalni izvod iz matične vjenčanih broj : ... od 15.11.2002. godine sa prevodom na jednom od jezika koji su u službenoj upotrebi u ovom sudu, svoj izvod iz matične knjige rođenih izdat od Matičnog ureda Općine Travnik broj : ... od 16.07.2009. godine i original punomoć za zastupanje za punomoćnike Greda Emira, Greda Vedrana i Greda Mirana, advokate iz Advokatskog društva „Greda“ d.o.o. Konjic.

Iz spisa predmeta proizilazi da je rješenjem ovog suda broj: 06 0 V 018941 24 V od 16.01.2024. godine, prijedlog za priznanje strane sudske odluke vraćen predlagatelju s pozivom da isti uredi u roku od 8 (osam) dana od dana prijema rješenja. Dalje proizilazi da je navedeno rješenje predlagatelj putem punomoćnika zaprimio dana 19.01.2024. godine. Dana 24.01.2024. godine u ovaj sud

zaprimljen je podnesak punomoćnika A. M. iz T., kojim traži da ovaj sud dozvoli produženje roka od 8 (osam) dana iz rješenja ovog suda broj: 06 0 V 018941 24 V od 16.01.2024. godine za uređenje prijedloga za priznanje strane sudske odluke, navodeći u istom da se radi o veoma kratkom roku, da su provjerom u Matičnom uredu općine Travnik utvrdili da brak između predlagatelja i protupredlagateljice uopšte nije zaveden u knjizi vjenčanih, dakle postupak upisa braka nije još okončan, te s obzirom da se predlagatelj nalazi u inostranstvu i da je potreban duži rok za dostavu traženog dokumenta. Rješenjem ovog suda broj gornji od 30.01.2024. godine uvažen je zahtjev punomoćnika predlagatelja za produženje roka za dostavu dokumentacije za 30 (trideset) dana od dana prijema navedenog rješenja.

Kako predlagatelj nije postupio po Rješenju ovog suda od 16.01.2024. godine, to ne sprečava ovaj sud za izvrši ocjenu osnovanosti prijedloga za priznanje strane sudske odluke, te je ovaj sud izvršio uvid u izvornik presude čije se priznanje traži i ovjereni prevod iste, te utvrdio da se radi o stranoj sudskoj odluci o razvodu braka između državljana Bosne i Hercegovine i Republike Srbije kojom je razveden brak vanparničnih stranaka sklopljen 15.11.2002. godine pred matičarem Generalnog konzulata Jugoslavije u Stuttgartu (broj vjenčanog lista ...), da je odluka čije se priznanje traži pravosnažna od 15.04.2011. godine, da su obje stranke sudjelovale u postupku koji je prethodio donošenju te odluke, odluka nije protivna odredbama Ustava BiH, reciprocitet se pretpostavlja, nije povrijeđen međunarodni javni poredak i za postupanje u predmetnoj pravnoj stvari ne postoji isključiva nadležnost suda niti nekog drugog organa u Bosni i Hercegovini.

Obzirom na činjenicu da je predlagatelj rođen u T. i državljanin Bosne i Hercegovine, da strana sudska odluka udovoljava uslovima za priznanje u državi čiji su državljani vanparnične stranke, te da predlagatelj obzirom da je rođen u Bosni i Hercegovini očigledno ima pravni interes da se strana sudska odluka prizna od strane ovog suda, te se slijedom izloženog prijedlog predlagatelja ukazuje u cijelosti osnovan.

Imajući u vidu naprijed izloženo, budući da ne postoje okolnosti koje bi bile u suprotnosti s Ustavom Bosne i Hercegovine, te utvrđenim osnovama državnog uređenja to su u cjelosti ispunjeni uslovi te je ovaj sud udovoljio prijedlogu i priznao stranu sudska odluku u skladu sa odredbama članka 86. do 97. preuzetog Zakona o rješavanju sukoba Zakona sa propisima drugih zemalja u određenim odnosima („Službeni list SFRJ“, broj 43/82, 72/82, Službeni list R BiH, broj 02/92), koji zakon je preuzet kao republički, a potom kao federalni i koji se primjenjuje u skladu sa člankom 458. Zakona o parničnom postupku Federacije BiH („Službene novine Federacije BiH“, broj 53/03, 73/05, 19/06 i 98/15) i člankom 28. stavak 3. točka e) Zakona o sudovima u Federaciji Bosne i Hercegovine („Službene novine Federacije BiH“, broj 38/05, 22/06, 63/10, 72/10, 7/13 i 52/14 i 85/21).

Troškove postupka snosi predlagatelj o čemu će sud donijeti posebno rješenje.

Sudija
Denis Trifković

